

Ikedowa Solat i

Juan

¹Se solat seini lekat kanak ininang epgengibing te simbahan. Sinolatan ko sikona bayi pinemalli te Timanem, aw minge batà nikaw ontò ko nedekelan te pedowan. Kenà olò siaken se doen dakel pedowan kenyo, meneng dakel heman se pedowan te kedita te otaw netaga-taga te kebenalan. ²Dakel se pedowan day kenyo so doen kebenalan diyà te pedowan tadon te wedad teman.

³Metoman kidon tebanan, aw keidowan, aw begayan te kelinaw te pedowan lekat te Timanem Amay aw Batà din si Jesu Cristo, so yan se ibegay dan diyà te kedita te otaw netaga-taga te kebenalan aw eppedekelay heman te pedowan.

Kedakel te pedowan

⁴Ontò neluba se pedowan ko, so kinità ko te doen minge batà no egtaking te kebenalan iling te punù te Timanem Amay diyà kenitadon. ⁵Simolat a den kamno bayi amon ipeaneng-aneng ko kamno te keilangan megpedekelay kidon te pedowan. Kenà kaling se punù insolat ko kenyo seini, so tapay niyo iyan netegahan lekat te ketebò te pegpemenal niyo ki Cristo kedengan. ⁶Ipetaga-taga tadon te dakel se pedowan tadon te Timanem pineokit te pegtolò tadon te minge punù din. Seini se impunù kenyo lekat te ketebò te pegpemenal niyo, te keilangan dakel se pedowan niyo.

⁷Medita se otaw eglegeb dini te keneyonan aw eg-akal dan te doma otaw, so kenà dan egtoladà te kebenalan tepad te pegpekeotaw i Jesu Cristo. Iling kenyan se eg-ikegiyen te otaw eg-akal aw eg-ato ki Cristo. ⁸Yan peg-ahà kaw amon eked pegkewedad se ontong tepad te ininang niyo, meneng kinewaen niyo se ontong te modi aldaw.

⁹Aw somoway se otaw lekat te kebenalan intoladà i Jesu Cristo, aw isogpat din se kebolalaw diyà te kebenalan, wedad Timanem kidoen kandin. Meneng aw ontò egsalig se otaw diyà te kebenalan intoladà i

Jesu Cristo, kidoen kandin se Timanem Amay aw Batà. ¹⁰Aw doen otaw domateng kenyo aw doen itoladà din kenyo kenà onawa te kebenaran intoladà i Jesu Cristo, ikà niyo egpepenayit kandin diyà te balay niyo. Ikà niyo heman egliyag kandin, ¹¹so aw lomiyag kaw kandin, mekeakop kaw heman diyà te medaet inang din.

Temanan te solat

¹²Doen pa medita kagi isolat ko peden kenyo, meneng eked a den solat, so ibeg ko meglegeana a kidoen kenyo amon megpebelaw-belaway kidon, so ibeg ko mesikop se keluba tadon.

¹³Na, se munge batà te kedowa no bayi pinemallì te Timanem, minikagi dan te eg-aneng-aneng dan kenyo.